

Geguritan

Rina Damayanti

PEPADHANG

Wengi tansaya tintrim
Tanpa udan utawa angin
Sepi
Amung keprungu kidunge jangkrik angrenggani ratri
Ing kene sun tumlawung
Suwung
Ati was sumelang
Marang sedyaning driya kang ora nemoni pepadhang
:dudu ora, nanging durung
Ujaring swara jroning dhadha
Durung...
Ateges isih ana pangarep-arep
Tumekane cahya madhang wengi kang lelimengan
Sumunare rembulan kang madhang ing dalan
Semono uga dalaningsun bakal antuk pepadhang
Simaning kantaka mug i enggal kasembadan
Guwosari, 021022

NENG NGENDI?

Neng ngendi sliramu?
Lunga tanpa pamit
Tanpa ninggal pesen
Njalari aku bingung
Pikiranku dadi suwung
Ah, iya
Mbokmenawa kowe bosen ngancani lakuku
Bosen nyritakake lelakonu
Lungaa yen pancen kuwi karepmu
Nanging sedhela wae
Janji aja suwe-suwe
Balimu tansah dakanti
Rengganana kertas kosong iki
Aksara, tembung, ukara
Ayo padha bali tumata maneh
Akeh lelakon kang kudu ditulis
Kanggo ngeling-eling kabeh prastawa kang wis ginaris
Guwosari, 031022

GUSTI...

Aku mbengok sora
Nanging datan ana kang nggraita
Aku ndhepipis
Nangis ora uwis-uwis
Waspa nelesi netra
Nyesegi dhadha
Kelingan sakehing dosa
Gusti, kula ajrih
Guwosari, 031022